

四庫全書

史部

欽定四庫全書

平定準噶爾方略前編卷四十七

乾隆七年十二月戊子

敕諭準噶爾台吉噶爾丹策零

奉

天承運

皇帝詔曰爾遣吹納木喀等請安進貢盡知爾屬下  
人謊言妄行之事聲明認罪恭順奏請朕深嘉子

爾稱前次奏章並非抗激因本處言語不同之故  
乞加寬宥朕本不以此介意也再爾前次奏請使  
人入藏熬茶朕加恩准行爾使半途回去今又請  
使人入藏從噶斯路去本不應允許但爾為父誦  
經作好事兼奏請之辭極其恭順朕特加恩准爾  
所請仍用三百人入藏并准路由噶斯但前去之  
人若分兩起一起先由噶斯那木罕入藏一起由  
多巴西寧貿易事畢方去不但我國官兵難以照

看即爾國使人亦難分道而行朕已面諭吹納木  
喀爾等既欲往西寧貿易三百人可仍作一起同  
至西寧貿易事畢即由多倫鄂羅木入藏朕酌量  
於途間賞給牲畜路費并命大員護送爾使於本  
處何時起程先期須報知我邊界大臣再爾奏稱  
巡視者直至喀勒占卡倫係我人錯會大皇帝前  
既准我巡視科卜多今遵照此旨每年至托爾輝  
而止觀爾所言仍疑我於彼處駐兵耳朕既降旨

息兵豈復食言必欲巡視可遣二三十人來令我  
守卡之人帶領巡察但須嚴飭來人無得生事再  
爾奏稱貿易之人不准由歸化城等處者由內地  
心疑之故既經和好豈敢妄行等語而來使吹納  
木喀亦懇請不拘人數年期併所往之處亦從其  
便倘如所請恐下人必起爭端小事漸成大事欲  
永遠和好必使信約彌堅方為有益豈可但計一  
時之利而數改已定之議乎朕為大君於理可行

即准行若不可行雖再三奏請亦終不允若必如此借端何如不通商之為得也爾宜酌其輕重仍遵定議而行為此特頒敕書交吹納木喀齋往隨敕賜各色緞十端磁器十二事加賞蟒緞八端並鷹犬各二

己丑

準噶爾部人達爾濟率親屬十六人來降

命賞給安插如例

庚寅

賜吹納木喀等筵宴傳

旨賜噶爾丹策零御用朝珠并

賞給吹納木喀等銀緞磁器有差

辛卯

準噶爾部人特古斯率親屬九人來降

命賞給安插如例

甲辰

恩免哈密等處兵丁應賠馬匹銀兩

上諭內閣曰據駐防哈密安西提督永常奏稱乾隆三年十一月十八日接辦理軍機大臣議定防所倒斃駝馬每年分款按額准銷之文迄今俱遵照辦理惟有自乾隆二年八月十五日以後至三年十一月十八日接奉定例以前此年餘間哈密赤金廠內共倒馬八百二十六匹因俱在未定額數之前屢經提臣援例寬免送部請銷部覆按例准



銷五百九十七匹其餘二百二十九匹乃逾額之  
項非奏明之項可比應令著賠臣查經營弁兵久  
已換班回營其中不無陞遷事故若逐一行催勢  
必累及妻子可否邀恩准銷等語此項例前逾額  
之馬雖例不准銷然邊地弁兵力量艱難朕所軫  
念著格外加恩准其一體報銷以示優恤該部可  
即行文該督撫等知之

辛亥

奏定定邊副將軍與將軍都統等文移儀注

定邊副將軍額駙策凌奏言臣蒙

皇上施恩授定邊左副將軍印信令酌量調遣綏遠  
城右衛歸化城游牧察哈爾內扎薩克兵丁凡  
將軍大臣等遇有事故調遣其如何行文儀注  
乞交部定議經辦理軍機大臣等議奏前撤兩  
路大兵留兵駐防邊境不復用大將軍北路以  
額駙策凌為總統授定邊左副將軍印信鎮守

萬一有警綏遠城右衛等皆豫備副將軍調遣  
其職任事權去大將軍不遠請副將軍行文綏  
遠城將軍歸化城都統副都統等用咨伊等用  
咨呈行文總管用劄伊等用呈其調至軍營俱  
定副將軍指示遵行奏入得

旨額駙之副將軍乃大將軍之副將軍也一切俱應  
如大將軍儀注所議甚是

癸丑

命侍衛達賚等護送夷使入藏

辦理軍機大臣等奏言準噶爾熬茶人進藏應  
派熟練之侍衛章京等四員護送前往去年已  
揀選正黃旗頭等侍衛達賚班布禮護軍叅領  
滿晉泰鑲白旗護軍副叅領來格四員引

見准其派往嗣因齊默特等即自東科爾回巢達賚  
等亦並回京來年照管熬茶來使可否仍用此  
四人奏入得

旨即著此四人前往

禁王貝勒等額外徵取貂皮

定邊副將軍額駙策凌奏言烏梁海向來供給  
屬主貂皮前奉

世宗憲皇帝諭旨烏梁海人衆因伊等屬主取供貂皮  
過重恐其生計艱難酌量裁減照數另行施恩賞給  
臣等會同王塞布騰旺布貝勒博貝議定每人  
原供貂皮五張內減去二張止供三張照數賞

給王貝勒等乳牛母羊每年孳生抵償此項令  
聞伊等仍取供五張應請禁止經議政王大臣  
議奏請將厄魯特王塞布騰旺布和托輝特貝  
勒青滾雜卜交理藩院察議仍嚴飭伊等嗣後  
照例遵行如再私取逾額定行從重治罪奏入  
上從之

更定軍營派撥看守綠旗兵五年一次換班  
定邊副將軍額駙策凌奏言原撥種地綠旗兵

六百名令派令看守城池倉庫定限三年一換  
為期太近往返徒勞請此番更換之後改為五  
年限滿方行替換辦理軍機大臣等議覆應如  
所請奏入

上從之

乾隆八年春正月己未

定議準夷挈眷投誠者改發寧古塔安插

定邊副將軍額駙策凌奏言向例準噶爾投誠

人等其隻身來者俱發內地安插其帶領眷屬  
來者俱發察哈爾安插嗣因人數漸多察哈爾  
地窄難容故亦改發內地竊思其中婦女嬰孩  
大抵未經出痘不習內地水土仰懇

皇仁嗣後攜眷投誠者均發東三省涼爽之地分住  
庶令伊等益遂其生經辦理軍機大臣等議奏  
盛京諸處現在行查無業游民不准編籍勒回本  
地不便又令準噶爾人混處至黑龍江所屬與



俄羅斯接壤又與北路相近亦不便令伊等居住惟寧古塔三姓與渾春之地在

盛京之東既與邊外遙遠又屬風土涼爽應如所請凡攜眷同來者該部照例給賞發往寧古塔安插奏入

上從之

丙寅

準噶爾部人額勒伯克率子諾海博羅特率弟

庫勒沁俱來降

命賞給安插如例

辛巳

上諭內閣曰北路軍營叅贊大臣著副都統拉布敦  
前往更換阿岱烏爾登給與副都統銜前往更換

塔爾瑪善

二月己亥

準噶爾部人阿必達鄂勒錐各率屬六人來降

命賞給照新例發寧古塔安插

戊申

巴圖爾婦人鄂勒錐來降如例賞給發往江寧  
隨夫巴圖爾安插

三月壬申

訓飭貝勒青滾雜卜

上諭軍機大臣等曰聞喀爾喀副將軍和托輝特貝  
勒青滾雜卜凡事怠惰並不在軍營効力去年查

閱伊屬下兵丁器械指稱有病不前又將伊本身  
開入軍營行走之例希圖雙俸經額駙策凌查出  
除名嚴行訓誡喀爾喀副將軍有承辦全部落之  
責係衆蒙古表率豈可稍有怠玩苟且青滾雜卜  
世受國恩並不實心報効殊屬不合著額駙策凌  
查明具奏嗣經傳詢俱供認不諱額駙策凌奏請  
治罪奉

旨青滾雜卜既自知其罪姑行寬貸嗣後當加意奮

免効力贖罪著將此旨諭令知之

夏四月甲辰

準噶爾部人巴圖博羅特夫婦來降

命賞給安插如例

閏四月癸亥

駐防哈密提督永常摺奏酌辦夷目貿易羊隻  
事宜

永常奏言噶爾丹策零令巴布等至境報稱進

藏熬茶仍遣吹納木喀等於四月初旬起程前來巴布等帶有馬羊求貨臣諭以今非貿易之年與定例不符該夷甚為悔懼哀懇再三求將疲乏不能驅回者變賣臣查視馬匹雖有疲乏尚可行走羊則擦掌乏弱者甚多察其言詞懇切而羊隻實難以驅回令馬匹仍留卡倫外止將羊隻二千餘與兵民交易仍諭以嗣後非貿易之年羊亦不許攜帶巴布等俱欣喜叩謝即

日起身回巢奏入報

聞

辛未

準噶爾部人阿喇卜扎扎木蘇等各率屬來降

命賞給安插如例

五月戊子

準噶爾部人博爾博來降

命賞給安插如例

庚寅

署川陝總督馬爾泰摺奏酌辦塔勒納沁官弁  
移駐三堡事宜

馬爾泰奏言前安西改設提督案內所有駐防  
哈密兵二千名分撥塔勒納沁駐兵三百名用  
遊擊一員統之三堡駐兵三百名用都司一員  
統之賽布什達里雅駐兵二百名用守備一員  
統之其餘一千二百名俱留駐哈密城臣抵哈



密以來相度形勢知塔勒納沁原非極衝之地  
城內又無倉庫錢糧應行防守而三堡一城實  
係哈密與準夷往來要路又聯接烏克爾等處  
卡倫居五堡之中平時既可坐鎮彈壓萬一有  
警又可收聚各卡塘兵丁在一城防守請將塔  
勒納沁三百名兵酌量更換卡塘之用以千把  
總一員統之其餘俱併歸三堡即將駐塔勒納  
沁遊擊移三堡駐防其原設都司撤回哈密辦

事在塔勒納沁城自無可虞而三堡實隱然成一重鎮足以固守軍機大臣等議覆應如所請奏入

上從之

丙申

定邊副將軍額駙策凌奏言查閱喀爾喀四部落軍容器械向經臣處派叅贊大臣二員前往今年實居比丁審事大盟會之期既經盟會又

派大臣前往查閱衆蒙古須兩次豫備不勝勞費請查閱軍容即交四部落之副將軍與盟主辦理分別優劣具報無容另遣大臣奏入

上從之

策凌又奏言據副將軍輔國公巴蘇呈稱扎薩克台吉格勒克怠玩公事前因閱視軍容伊屬下器械不修兵數短少經叅贊大臣等嚴行訓飭格勒克並不悛改應備大營需用駝馬屢次

嚴催全不交納容隱奸拐在逃之厄鱗經貝勒  
旺扎爾在伊旗下拿獲格勒克又強行奪取甚  
屬不法請加懲治經臣查訪屬實奏入得

旨交部議處

癸卯

侍郎玉保奏報熬茶夷使吹納木喀巴雅斯瑚  
朗等入境

乙巳

準噶爾部人達什林沁來降

命賞給安插如例

己酉

命賞拉達克汗策卜登那木扎爾

上諭軍機大臣等曰拉達克汗策卜登那木扎爾將

自準噶爾脫出之馬甲卓鼐辦給口糧馬匹送至藏

內朕甚嘉予著賞給各色緞八端玻璃磁器八事

六月甲戌

命辦理夷使速行進藏

上諭軍機大臣等曰據侍郎玉保所奏噶爾丹策零  
此次遣使進藏熬茶其詞貌俱極恭順且請將所  
攜貨物先在東科爾貿易朕之恩准夷使入藏者  
因噶爾丹策零懇請為伊父修行善事故特允之  
前次來使因貿易羈留遂至過時不能前進半道  
空回此次所攜貨物並無從前羚羊角綠葡萄等  
項止係皮張尚易於變易著行文甘肅巡撫黃廷

桂令其即往西寧將夷使交易之事速行料理俾  
得即日起程若復遷延過時不能入歲將來又須  
另為辦理此次一切俱令寬裕施恩籌辦妥協速  
竟其事著玉保將朕加恩接濟并令即行進歲之  
故曉諭夷使等知之

丙子

獎賞貝子旺扎爾旗分協理台吉旺扎爾扎卜

定邊副將軍額駙策凌奏言貝子旺扎爾旗分

協理台吉旺扎爾扎卜向因屢此資助軍營牲  
畜部議授為頭等台吉茲以豫備游牧兵護視  
哲卜尊丹巴胡土克圖伊念本旗貧乏於本分  
應辦外請每年更為代辦一百名牲畜口糧甚  
屬急公理合奏

聞奏入得

旨旺扎爾扎卜著加恩獎賞該部議奏

秋七月辛丑



賞給喀爾喀官備駝馬牛羊一十四萬有奇

辦理軍機大臣等奏言喀爾喀各扎薩克旗分  
所存官駝二萬五千有餘馬四萬有餘牛一千  
有餘山羊八萬有餘自置買以來並未應用今

蒙

聖諭此項駝馬牛羊常令蒙古收管牧放恐倒斃賠  
補或滋擾累可給賞伊等為業資其蕃息于生計  
有益臣等遵

旨請交額駙策凌均勻給賞尋策凌奏請留駝一萬  
馬二萬羊二萬以備軍營之用軍機大臣等請

仍令遵

旨辦理奏入

上從之

九月壬午

夷使吹納木喀等自哈丹和碩起程進藏侍郎

玉保等傳

旨加賞口糧換給駝馬

癸未

訓飭哲卜尊丹巴胡土克圖

辦理軍機大臣等奏言據侍衛常吉圖等報稱  
胡土克圖欲往額爾得尼招寺廟禮拜職等告  
以理應奏

聞俟

命下遵行伊言諸事已備前往無妨即於八月十六

日自庫倫起程臣等查胡土克圖年少無職任  
意而行其徒楚揚托音及圖謝圖汗敦丹多爾  
濟既不阻止又不具報均屬不合請交部察議  
奏入得

旨胡土克圖欲往額爾得尼招禮拜應候朕旨若果  
奏請朕自必准行乃並不具奏又不納侍衛等規  
勸之言急行前往甚屬錯誤著飭行餘依議

戊戌

準噶爾部人額勒伯克夫婦來降

命賞給安插如例

冬十月甲戌

安西提督永常奏報準噶爾進

貢使臣圖爾都等入境

十一月辛巳

自準噶爾脫出經拉達克送歸之馬甲卓鼐奉

旨引

見授為護軍並賞銀五十兩

戊子

準噶爾部人額爾奇沙喇率弟烏蘇都娃和尼  
青來降並

命賞給安插如例

安西提督永常奏報貿易夷人圖卜濟爾哈朗  
等入境

丙申

恩免那克素番民應納銀兩

上諭內閣曰據副郎都統拜奏稱那克素三十九部番民豫備馬匹牲畜為接濟護送吏使官弁之用因官弁等其力尚堪自給並未動用番民所備等語此次雖未經應用但伊等番民生長邊末感激國恩黽勉急公甚屬可嘉應施特恩將伊等明年應納錢糧盡行寬免以示鼓勵

十二月甲寅

侍郎玉保等奏報夷使吹納木喀等自藏起程  
還部

癸亥

命準噶爾回藏之喇嘛羅卜藏丹怎來京安置

將軍烏赫圖等奏言夷使吹納木喀帶回藏地  
之喇嘛羅卜藏丹怎經臣等詢問係從前策妄  
阿喇布坦留下未經遣回之人居住二十六年  
今因熬茶之便懇求回藏並無別情請照上年



喇嘛噶津林沁之例留於羅倫布廟居住交與  
郡王頗羅鼐善為防範奏入得

旨羅卜藏丹怎係在準噶爾久居之人不可深信若  
令在藏居住恐有私行送信之事著索拜將羅卜  
藏丹怎及從前回藏之噶津林沁等俱送至京師  
寺廟安置

甲子

夷使圖爾都等至京進表謝

恩並貢方物

準噶爾台吉噶爾丹策零謹奏

大皇帝使臣吹納木喀得從噶斯路進藏補給口糧  
並准每年遣二三十人查閱托爾輝又至肅州  
貿易人等不論何時一聽其便來京貿易者若  
畏京城路遠即在甘州涼州蘭州西安等處貿  
易皆蒙降

旨允行甚為感戴懽悅謹使圖爾都等謝

恩恭請

大皇帝萬安貢玉碗一隻馬二匹貂皮三十張奏入

報

聞

丙寅

準噶爾部人那木喀濟木扎率屬十人來降

命賞給安插如例

丁丑

賜圖爾都等入

觀乾清宮并令進觀步踏

上諭圖爾都等曰朕本欲明年召見爾等賜予筵宴  
因爾等求觀步踏故今日即令瞻仰噶爾丹策零  
疏內稱前往西藏之人准由噶斯路賜助牲畜每  
年准派二三十人巡閱托爾輝等處故遣爾謝恩  
請安朕深為欣慰一應進藏所加恩典吹納木喀  
回巢時自然詳悉告知爾台吉查閱托爾輝乃係

朕諭旨但疏內又稱貿易之人不論何時皆可前來來京貿易者在甘涼等處任便皆准貿易並非朕之原旨朕大臣等奏言此係噶爾丹策零巧詐以圖僥倖朕言噶爾丹策零未必如此巧詐蓋伊使者稟告之誤也昨朕大臣向爾訊問果係爾等誤告之故大凡為使之人往返勞頓詞語繁多隻言片語保無錯誤朕亦不追咎爾等但爾等歸時須詳告噶爾丹策零知悉貿易之人於限定年

分或春夏或秋冬總在一年之內不論何時皆准  
進邊貿易非不分年限無論何年皆可前來也若  
來京貿易亦應在定限來京之年但爾等貨物皆  
係自備脚力原屬艱難京師道遠力不能前即在  
肅州貿易亦屬可行肅州與爾游牧相近尚可獲  
利若在甘涼等處實屬不便朕並非以爾等為外  
夷不令留頓甘涼也爾等來時並從彼處經行其  
地皆屬褊小商販無多爾等貨物到彼若貨賣不

盡將馱載回歸耶抑久住以待售耶勢必反至失  
利於爾等何益肅州亦屬褊小不比京師因前既  
與爾國議定先期傳集商人至彼與爾貿易若無  
指定之處商人豈能各處豫備耶如欲來京貿易  
於定限年分仍來京不然即在肅州亦可朕此等  
籌畫皆與爾等有益爾明告噶爾丹策零知之夷  
使圖爾都叩謝奏言

大皇帝諭旨甚是所稱貿易無論何時與甘涼等處

皆可貿易之語

大皇帝敕書內實未開載我等來時曾向中國大臣  
言及意謂已經許可誤行稟告噶爾丹策零遂  
據我等之言寫入疏內乃我等之過非噶爾丹  
策零有意如此也

上諭曰偶爾錯誤朕不責備想噶爾丹策零亦未必  
歸咎於爾爾等可勿疑懼惟以朕敕書開載者為  
憑自屬妥協但一切事宜既經議定自當永遠遵



守令初次舉行即便反覆可乎不惟於事無益衆人觀瞻亦屬不雅朕前降旨甚明豈有即行更改之理可傳諭噶爾丹策零其善體朕意圖爾都奏稱一切事宜

大皇帝皆已降

旨敬謹記憶回時詳告噶爾丹策零知之

乾隆九年春正月壬午

賜準噶爾使臣圖爾都等宴

先是辦理軍機大臣等奏言準噶爾使臣圖爾都奉

旨於豐澤園設帳殿筵宴請照從前筵宴吹納木喀之例具儀以

聞奏入

報可至是

命尚書班第等預引圖爾都於

聖駕未臨之前立首班大臣末齊跪迎

駕

上陞座引進行禮傳

旨諭圖爾都以爾極其誠敬

皇上特加恩寵不以外國異視與中國臣工一體行  
禮夷使叩謝入宴復傳

諭旨因爾台吉噶爾丹策零恭順遣爾來請朕安爾  
亦誠敬可嘉故特加恩賜宴爾於宴所可隨意醉  
飽以盡爾懽勿以大禮所在致生拘束所演各藝

爾詳細觀看俟回時告知爾噶爾丹策零可也

上親賜大臣酒時召圖爾都近前跪

賜飲三爵並傳

旨賞噶爾丹策零粧緞漳絨寧絢各二端玻璃器六  
事珫瑯器四事使臣圖爾都大緞四端玻璃器四  
事白銀二百兩

庚寅

駐藏副都統索拜奏報熬茶夷使在藏言語情

形

索拜奏言據郡王頗羅鼐告稱上年十月初四日夷使喇嘛尚卓特巴宰桑吹納木喀至大小廟拜佛謂頗羅鼐曰我噶爾丹策零聞拉達克人言土伯特黃教盛興今我等到此黃教果覺興旺比前不同頗羅鼐答曰我土伯特地方不特黃教日興民生亦日安樂此皆

大皇帝廣興黃教撫輯羣生所致十月二十二日尚

卓特巴吹納木喀又謂頗羅鼐曰噶勒招穆倫  
河邊之策地方原是溫都遜喇嘛等坐禪之廟  
聞此廟破壞我噶爾丹策零令我等攜帶銀兩  
而來欲煩王子代為修廟令溫都遜衆喇嘛照  
常坐禪頗羅鼐答曰我仰賴

大皇帝洪恩豈不能修一廟宇但喇嘛坐禪常在山  
上蓋房所以策地方不必重修況汝台吉噶爾  
丹策零並未奏請在彼處脩廟我未奉

大皇帝諭旨何敢擅行十一月二十六日第巴喇嘛  
與宰桑巴雅斯瑚朗謂頗羅鼐曰我等到大小  
各寺廟熬茶留心細看宗喀巴佛之黃教實屬  
比前興旺衆喇嘛亦覺齊整甘珠爾經丹珠爾  
經甚是靈應乞王子將汝誠心扶助黃教所行  
一切事體寫明付我等攜歸與噶爾丹策零觀  
看頗羅鼐答曰我本土伯特地方一微小台吉

蒙

大皇帝隆恩拔至郡王振興黃教成就甘珠爾丹珠  
爾經以安土伯特之人此皆仰賴

大皇帝之恩非我力所能成就若將我如何振興黃  
教之處寄與噶爾丹策零我自愧無能不敢矜  
誇此事亦不可行第巴喇嘛宰桑巴雅斯瑚朗  
又曰我準噶爾地方並無好額木齊噶爾丹策  
零分付我等熬茶事畢將好額木齊與通經好  
大喇嘛延請一位帶回乞王子即為給發前去



頗羅鼐答曰汝等欲請好額木齊及通經好喇嘛並未奏請

大皇帝既未奉

大皇帝諭旨此事我何敢專主自夷使至藏後言語情形稍有關係者只此數項理合奏明奏入得旨所奏俱悉頗羅鼐所辦一切事務俱極得體甚屬可嘉著傳旨獎諭

辛卯

川陝總督慶復奏報貿易夷人圖卜濟爾哈朗  
等至肅州

甲午

召諭夷使圖爾都

上召圖爾都入見於

圓明園

賜觀煙火

諭之曰朕召見爾等三四次矣爾貿易事竣即可啟

行歸告爾台吉噶爾丹策零一切事宜總憑朕所  
降謄黃諭旨為定和好之事以信為本既已議定  
永遠奉行不爽使內外羣生均得安樂不亦善乎

辛丑

命恩賞郡王頗羅鼐

上諭內閣曰此次準噶爾之人入藏熬茶所有賞給  
路費口糧雖係動用帑項豫備而郡王頗羅鼐實  
心効力凡來使所用之物一切俱辦妥協甚屬

可嘉著加恩賞蟒緞二端大緞四端即交與來使  
齋往

壬寅

賜準噶爾台吉噶爾丹策零勅書

奉

天承運

皇帝詔曰爾奏疏內稱據使者吹納木喀歸奉到諭  
旨我屬前赴西藏之人准由噶斯路行走賜助牲

畜盤費托爾輝地方每年遣派二三十人前往查閱是以遣使者圖爾都具奏恭請聖安朕欣悅嘉納又奏稱曾經奉旨來肅州貿易之人無論何時乘便而來來京貿易之人願赴京者聽其來京若以京師遙遠准在甘州涼州蘭州西安等處聽其所願貿易其貿易時與通事同往街市購買需用貨物等語此則與朕原降諭旨迥異故我國大臣向爾使者圖爾都訊問據云大皇帝諭旨內原未

諭及茲事吹納木喀等曾向大人言及以為大人  
業已允行是以歸而誤告噶爾丹策零噶爾丹策  
零誤以為大皇帝諭旨故寫入奏疏等語大凡使  
者往返行走語言繁多隻言片語豈無舛錯朕亦  
不咎既係爾使者誤告爾宜仍照朕前旨遵行其  
來肅州貿易之人於應來年分無論何時隨到皆  
可准其進邊貿易至來京貿易之年爾等以京師  
遙遠難以前來欲在肅州貿易亦可若甘州涼州

等處地方褊小商賈聚集無多與爾等交易無益  
朕為大皇帝事若可行則施恩准行和好之事必  
慮久遠既已議定永遠遵守不爽始為有信今特  
頒詔旨付爾使者齎回隨勅賜佛二尊並賞各色  
緞十端錦緞粧緞各八端玻璃磁器十五事

乙巳

準噶爾使臣圖爾都自京起程還部

二月庚戌

命傳

旨獎諭郡王頗羅鼐

駐藏副都統索拜奏言郡王頗羅鼐告臣等云  
準噶爾來使第巴喇嘛吹納木喀等於啓行先  
一日過我辭別據吹納木喀云自今以往我台  
吉噶爾丹策零於

大皇帝前永矢恭順闡揚黃教不但兵戈永息羣生  
亦皆樂業不知如何始得結信於



大皇帝可以永久不渝我答以

大皇帝包容四海以天地為心與日月並明中外並  
無岐視諸部之人悉皆一體同仁即如爾等至

藏熬茶

大皇帝格外加恩賞給馬駝路費俾極充裕爾等將  
還又加

恩賜爾熬茶之事得以完善者悉由爾台吉於

大皇帝前恭順有加誠心懇請之所致也聞爾台吉

素奉黃教自今以後惟有恭敬釋迦佛常如臨  
之在上虔心供奉事

大皇帝恭謹彌篤一切悉遵

諭旨訓誨必得厚福我土伯特雖為黃教藏地前此  
初無如此蕃盛唐古忒人亦從無如此安樂後

因

大皇帝廣闡黃教休養衆生是以自五世達賴喇嘛  
班禪額爾德尼至我頗羅鼐悉予印授封疊荷

隆恩有加無已人物愈加庶富此蒙古唐古忒人所  
共知者爾歸將我言告知爾台吉噶爾丹策零  
是否任其自擇吹納木喀等皆以為然彼又云  
聞前入藏人言此地唐古忒人不能乘馬兵械  
亦不完備今我至喀喇烏蘇時爾子扎薩克台  
吉珠密納木扎爾率兵迎接將軍侍郎觀爾地  
之人乘騎兵械亦甚可觀我答以此乃興黃教  
之地素不以武備為事因爾前台吉起兵襲藏

我唐古忒始重武備悉加意練習且

大皇帝加恩令我統轄藏事我悉力簡閱甲兵繕治  
軍械他部即有以兵犯我邊圉者亦久已有備  
蒙古唐古忒兵藉

大皇帝天威足資抵禦等語吹納木喀等唯唯而退  
奏入得

旨頗羅鼐與夷使應答言語極為得體此皆伊平日  
感朕厚恩實心報効是以所言皆合朕意實屬可

嘉著傳諭頗羅鼐知之

三月丙戌

恩賞在藏熬茶辦理夷使郡王頗羅鼐子公朱爾默  
特策卜登等緞疋有差

上諭內閣曰此次準夷進藏熬茶郡王頗羅鼐之子  
公朱爾默特策卜登等感戴朕恩管轄兵丁暗中  
防範各處卡哨出力報効殊屬可嘉應加特恩賞  
給頗羅鼐長子公朱爾默特策卜登次子扎薩克

頭等台吉珠密納木扎爾辦理噶卜倫事務公班  
第達蟒緞各二端大緞各二端賞給噶卜倫扎薩  
克頭等台吉策凌旺扎爾布隆燦色玉特塞卜騰  
扎薩克頭等台吉齊旺多爾濟大緞各一端官用  
緞各二端再賞給岱綢羅卜藏達爾扎章魯占巴  
達顏台吉巴扎爾鼐大緞官用緞各一端以示鼓勵  
己丑

駐防軍營叅贊大臣副都統慶泰期滿以副都

統保德代之

庚寅

駐藏副都統索拜疏奏酌議安置準噶爾回藏喇嘛噶津林沁及解送羅卜藏丹怎來京事宜索拜奏言上年十二月內奏

諭旨令臣於準夷熬茶事竣將自準噶爾回藏之喇嘛羅卜藏丹怎及噶津林沁等一併送至京師寺廟安置臣當即傳諭郡王頗羅鼐據云喇嘛

羅卜藏丹怎噶津林沁俱在準噶爾久居人不  
可信但噶津林沁乃拉達克人幼為班禪額爾  
德尼弟子居扎什倫布廟我猶及見今自準噶  
爾回藏後我留意訪察不惟無偵探消息行間  
構釁之事於班禪額爾德尼實亦誠信敬奉今  
若移送京師拉達克人必得聞知若失其意後  
此探報準噶爾消息恐致阻礙且噶津林沁年  
已七十餘病腫衰殘餘生無幾我今可信人時



嚴防範必不致有啟釁之事我意噶津林沁不  
必赴京止將羅卜藏丹怎解送京師似為妥協  
等語臣思噶津林沁為拉達克人未入版圖而  
年老病廢移送京師彼或以老病為詞請將羅  
卜藏丹怎遣員解送京師噶津林沁候

肯定奪奏入得

旨著照頗羅鼐所請行惟防範之事頗羅鼐宜益加  
勸勉為善

甲辰

川陝總督慶復疏奏籌辦準夷肅州貿易事宜  
慶復奏言肅州鎮道呈報準噶爾甲子年貿易  
夷人於正月十三日到肅所攜貨物俟派出商  
人李永祥至肅交易其羊二萬三千餘隻路遠  
羸瘦水草不宜夷人急於求售李永祥尚未至  
肅且為數甚多亦難悉售之近地應倣安西之  
例於公帑給值以羊分子提鎮標兵扣餉償帑

但夷人索價甚昂尚未議定臣查夷人無知索  
值但當從容開示以釋其疑至今年已定以貨  
易貨之例雖前在哈密曾給現銀今在肅必將  
羊價議定併入諸貨之內令商人以內地貨物  
互易至商人到肅不能牽羊遠售分子各兵以  
餉抵值此係內地自行變通辦理之道但期於  
兵有益議亦可行復准甘肅撫臣黃廷桂手札  
及肅州鎮道呈報云准夷貿易方經定例以貨

易貨夷人所攜貨物羊與馬駝計值銀四萬兩  
有奇因聞肅州地少巨價必招商異地夷人殊  
窘迫求售及聞以貨易貨則云上年東科爾全  
數給銀固為

大皇帝格外深仁而俄羅斯各處我部曾有人往彼  
見其與內地交易有貨物有金銀何以今年肅  
州概不給發若盡以貨易我輩寧攜歸貨物此  
事所關頗重倘夷人於以貨易貨之外仍不免

索銀應如何辦理囑臣扎復臣復扎云準夷年  
來貿易獲利數倍今當恪遵

諭旨堅持易貨始可遏其無厭之心該夷今年所攜  
皮貨甚少而羊與馬駝值銀不過數萬彼攜回  
原貨之說亦狡獪之詞然因時制宜亦不必遽  
令缺望蓋示以以貨易貨之常例可杜日久無  
已之貪心今若稍以銀互市再為申明定例堅  
其後約亦為兩得然必須文武曉諭俟商人熟

察夷情詳定價值如果感服公平方稍為給銀  
一面辦理一面奏

聞始覺周密惟當仰體

聖主撫戢萬方之意審其輕重要協辦理奏入報  
聞

平定津噶爾方略前編卷四十七

欽定四庫全書

平定準噶爾方略前編卷四十八

乾隆九年夏四月乙亥

準噶爾部人鄂勒錐來降

命賞給安插如例

川陝總督慶復奏報貿易夷人圖卜濟爾哈朗  
等自肅州起程還部

五月戊戌



駐藏副都統索拜疏奏議設哈喇哈達卡倫事  
宜

索拜奏言准兵部咨郡王頗羅鼐欲令伊唐古忒兵丁在哈濟爾得卜特爾地方安設卡倫此欲豫得準噶爾信息以為保固之計應如頗羅鼐所請令索拜會同駐劄西寧副都統莽古賚公同商酌應於何處安置防範并何時應設應撤之處定議奏

聞臣隨知會頗羅鼎續據頗羅鼎呈稱穆魯烏蘇河  
之前有哈喇哈達地方為哈濟爾得卜特爾通  
衢準噶爾賊人如欲來藏必經由此路於此置  
設卡倫不時瞭望可無疎虞然必會同駐劄西  
寧大臣商議簿書往返動需時日今歲將不及  
置設準噶爾賦性狡猾近由藏還巢益當亟加  
防範請遣我所信第巴巴克都率兵十五名於  
五月間前赴哈喇哈達瞭望賊跡偵探防範俟

十月雪降役人不能行時斟酌調還於我土伯  
特裨益實多臣因設置卡倫為地方緊要之事  
不及會商西寧副都統即令頗羅鼎嚴諭所遣  
第巴巴克都至哈喇哈達時遣人赴哈濟爾得  
卜特爾偵探蹤跡一有賊人消息即時呈報並  
移文駐劄西寧副都統如彼地於哈喇哈達置  
設卡倫已為合宜即無庸置議倘或更有應置  
卡倫接應之地即行定議奏

聞請

旨奏入報

聞

六月癸丑

駐藏副都統索拜期滿以副都統傅清代之

辛未

準噶爾部人扎卜多爾濟翰克濟爾哈朗等來

降

命賞給安插如例

七月庚寅

議撥西寧縣倉糧貯給沙喇庫圖爾駐防兵食  
甘肅巡撫黃廷桂奏言西寧口外日月山西南  
地名沙喇庫圖爾距丹噶爾六十餘里乃賊番  
出沒經由之處築堡設守備把總馬步兵駐防  
其地孤懸口外氣候甚寒不能耕種又係新設  
之地無糧可撥官兵起支例係折色高販稀少

兵丁謀食維艱請於西寧縣倉採買備貯糧內  
撥糧五百石交營員收貯每年存二借一秋後  
扣餉買還以濟兵食經軍機大臣議如所請奏  
入

上從之

辛卯

輔國公索諾木達爾扎卒以其子恭格丹津承  
襲

上諭內閣曰索諾木達爾扎之公爵部議無庸承襲  
固屬按例辦理第念索諾木達爾扎係達賴喇嘛  
之父

皇考加恩達賴喇嘛

特予封爵伊亦深感

皇考之恩行走謹慎歷有年所今已溘逝深為可憫著  
加恩令伊子恭格丹津仍襲輔國公之職以示優

眷

九月戊子

命嚴緝解京脫逃之喇嘛羅卜藏丹怎

上諭內閣曰據副都統索拜奏稱將挑取嫻於經卷之喇嘛及由準噶爾回藏之喇嘛羅卜藏丹怎等

解送京師於七月初七日至察木多所屬之部郊地方喇嘛羅卜藏丹怎帶伊僕役薩木都卜達什等騎馬逃亡等語喇嘛羅卜藏丹怎乃朕特旨令解送京師之人所關甚要把總馬雄於途次怠玩



致令逃亡情甚可惡著拿送京師交刑部從重治罪索拜於送此緊要之人僅派一陋劣把總與十五名兵解送亦屬疎忽著交部嚴行察議具奏其逃亡之喇嘛羅卜藏丹怎等速交郡王頗羅鼐四川巡撫紀山提督鄭文煥等務嚴行捕獲鎖解京師如有隱匿容留濟助行糧之人亦即拿獲嚴審治罪再羅卜藏丹怎之逃亡必懷異志此去尋西路小道逃往俱未可定並速行文駐西寧之副都

統莽古賚安西提督永常於一切塘汛地方及各處隘口俱令用心防禦務期弋獲

己丑

上又諭內閣曰駐藏辦事副都統索拜於解送朕特旨令送京師之喇嘛羅卜藏丹怎一事並不選派強幹之人飭令嚴加防範至使中途脫逃已將索拜交部議處今既派出副都統傅清前往更替索拜此際若已經拿獲則已如未經拿獲傅清雖已

抵藏索拜亦不得即行回京著解任仍留彼處俟  
拿獲羅卜藏丹怎時再行回京並降旨郡王頗羅  
鼐伊向來諸事奮勉誠心報効於查拿此等逃亡  
之犯必能努力然羅卜藏丹怎原係察木多之人  
觀其行至原處逃亡其中必有容留藏匿濟助牲  
口行糧之人伊所到之處凡屬下之唐古忒等念  
係喇嘛瞻顧不行擒拿亦未可定著頗羅鼐留心  
嚴飭各處實力查拿務期弋獲再似此由準噶爾

回藏之喇嘛噶津林沁等前經頗羅鼐奏請停其  
解送京師安置於扎什倫布廟內但以此次解送  
之羅卜藏丹怎中路脫逃而論則伊等必懷異志  
若將噶津林沁仍留藏內頗羅鼐能保其斷然無  
事即無庸解送若不能保仍遵前旨飭強幹人員  
用心防範解送京師察木多之紀瓦帕克巴喇胡  
土克圖亦是荷蒙國恩之大喇嘛於伊所屬一切  
地方通行嚴飭務必獲羅卜藏丹怎斷不得稍

有疎忽以致漏網可即行文曉諭知之

丙申

準噶爾部人達爾扎卜巴朗等來降

命賞給安插如例

冬十月庚午

命索拜帶領赴藏兵丁回京

上諭內閣曰前曾降旨令索拜留藏協同傅清等緝捕羅卜藏丹志不必即行回京今據四川巡撫紀

山奏稱將派出隨同傅清之綠旗弁兵俟抵藏後  
令於索拜回京時沿途隨回等語若不能即獲羅  
卜藏丹怎必至弁兵久待索拜既交該部察議治  
罪一俟傅清到藏無庸留藏仍著來京將查拿羅  
卜藏丹怎之事交頗羅鼐傳清等遵朕前旨辦理  
十一月丙戌

巡查準噶爾放卡情形

定邊副將軍額駙策凌奏言准軍機處咨準噶

爾以防範逃人為辭從伊原舊放卡處漸移距  
我卡甚近經額駙策凌於二月內奏報有厄魯  
特在布爾哈台阿達克布爾噶蘇放卡七月內  
奏報有厄魯特在巴爾楚克口察罕布爾噶蘇  
放卡竊照厄魯特等所稱在巴爾楚克口察罕  
布爾噶蘇地方坐卡者即是前在布爾哈台阿  
達克布爾噶蘇地方坐卡之人換回坐卡等語  
查此兩處地名不符詳對繪圖亦甚不明經本

處奏請應行文額駙策凌令將巴爾楚克口與  
察罕布爾噶蘇地方或在阿爾台山前或在山  
後再此地方與內地卡倫相對離距遠近詳查  
具奏以便俟夷使來時曉諭令其撤回臣查去  
年十一月內在巴爾楚克卡倫遇厄魯特巴爾  
袞額木可扣在布爾哈台阿達克布爾噶蘇地  
方放卡一事經該卡護軍校烏得等查得巴爾  
袞等現住之卡與我兵所住之巴爾楚克卡倫



相對在阿爾台山後相距卡倫馬行一日一夜  
可到又據薩拉布拉克坐卡護軍校安金保報  
稱準葛爾得木齊沙喇卜所住之處與我兵所  
住之薩拉布拉克卡倫相對馬行一日一夜可  
到等語今年七月內據前赴南路略地之三等  
侍衛佛保等報稱出喀勒占和碩到理藏木記  
處有厄魯特巴濟給伊棟等放卡居住等語臣  
等將伊等先後所報之處訊之通知地方之蒙

古等俱稱阿達克布爾噶蘇與察罕布爾噶蘇俱是一道在阿爾台山後至去年厄魯特額木可扣等所住之布爾哈台與阿達克布爾噶蘇及今年所遇之厄魯特巴濟給等所住之察罕布爾噶蘇俱是一處地名與我巴爾楚克薩拉布拉克兩卡相對與薩拉布拉克又覺稍近約略有一百餘里奏入報

聞

戊子

安西提督永常奏稱準噶爾進

貢使臣哈柳入境

癸巳

準噶爾部人察罕庫克新率親屬六人來降經

軍機大臣等請

旨照例賞給安插奉

諭旨察罕庫克新前來投誠數次俱被擒獲始終克

矢誠心來投甚屬可憫著格外施恩授為七品官  
賞給官用緞二端布卡尺餘依議

十二月壬子

恩准夷使哈柳赴肅貿易

先是安西提督永常奏報準噶爾遣宰桑哈柳  
等請

安進貢攜帶貨物懇請貿易得

旨軍機大臣議奏尋議哈柳違議帶貨自應不准貿

易但乾隆七年吹納木喀來京帶有貨物再四  
哀懇已准售賣此次應仍准交易令該提督一  
面護送夷使來京一面令其運貨往肅州出售  
至是

上諭軍機大臣等曰據永常奏稱夷使哈柳稟稱此  
次帶來駝馬係隨路更換並非貨賣祇求將牛羊  
留下售賣即是恩典情辭極為恭順其所帶牛羊  
并乏弱馬匹已留於哈密如蒙恩准其赴肅貿易

請照吹納木喀之例派官兵照料前往等語從前  
進貢夷使隨帶貨物亦曾加恩准其貿易此次哈  
柳所有牛羊等物著准其所請在肅交易爾等可  
寄信與慶復黃廷桂令其派委幹員照例辦理并  
傳與永常知之

戊辰

準噶爾部人翰庫爾來降

命賞給安插如例

乾隆十年春正月甲午

更定哈密防兵換班日期

川陝總督慶復奏言哈密留防兵二千名向例二年更換一次經前督臣馬爾泰奏明四月先換一半九月再換一半俾新舊相間得以教習一切防卡事宜令乙丑年又屆應換查四月九月新舊交代換回之兵於五月十日起程時值盛暑隆冬行走維艱應請酌改於三月八月更

換不過移前一月既於戌卒有益亦可無誤邊  
防奏入

上從之

己亥

夷使哈柳至京進表請

安並貢方物

準噶爾台吉噶爾丹策零謹奏

大皇帝蒙



大皇帝諭旨接濟我等前往西藏念經之人牲畜路費念經之時又蒙

大皇帝憐憫准照我等所請辦理不勝欣喜感激之至從前我等地方未立法性教現在新立此教所有西藏請來好喇嘛業已大半亡故現在所存甚少且年皆衰邁若由土伯特地方揀選通於經呪好喇嘛

賞發前來則我等地方經呪之教可以永久不絕而

大皇帝之恩德亦永久感戴矣為此奏請餘言令使  
臣口奏恭進玉椀木椀各一隻貂皮三十張並  
犬馬各二奏八

上命尚書海望等訊問哈柳噶爾丹策零奏摺內令  
來使口奏何語據哈柳稟稱噶爾丹策零令我  
將請發喇嘛事口奏

大皇帝又令我奏我等熬茶之人由藏回來頗羅鼎  
辦給牲畜路費不甚妥協與先例不同頗羅鼎

原係拉藏汗屬下書寫之人大抵仍思拉藏汗  
舊仇所以如此嗣後我等行走仍請照先例辦  
理之處伏祈明白飭諭海望等據辭覆奏報

聞

庚子

宣諭夷使哈柳

上命尚書海望等傳諭夷使哈柳曰爾噶爾丹策零  
本章朕已觀覽爾等口奏之言大臣等亦經奏聞

觀噶爾丹策零所奏為尊佛法立法性教欲請藏  
內喇嘛實屬善事其詞意誠篤朕甚嘉之但爾等  
到藏熬茶即欲邀請喇嘛頗羅鼐未曾給發爾等  
回後頗羅鼐奏到準噶爾來使欲請喇嘛未奉大  
皇帝諭旨未曾給發伊等回去或又奏請給發亦  
未可定但從前準噶爾人等擾亂藏地拆毀寺廟  
有侵害土伯特之仇俱不願前往乞大皇帝睿鑒  
爾等又稱熬茶之人頗羅鼐辦給諸物不甚妥協

想因尚念拉藏汗之仇是以如此朕為天下共主  
不分內外遠近一視同仁因從前爾等有亂藏之  
事彼此猜疑至今未息衆喇嘛皆佛門弟子伊等  
不願前去朕豈可迫遣此事不便降旨理應停止

哈柳跪奏

大皇帝諭旨我當謹記歸告噶爾丹策零海望等覆  
奏報

聞

辛丑

賜準噶爾使臣哈柳宴

先是辦理軍機大臣等奏言此次夷使哈柳奉  
旨於西廠帳殿瞻仰

天顏

恩賜筵宴具儀注應照上年筵宴夷使圖爾都之例  
預備奏入報

聞至是月夷使哈柳入宴

上諭之曰朕昨遣大臣所降諭旨爾俱領悉否哈柳

跪奏

大皇帝諭旨俱已敬謹領悉特因頗羅鼎與我處不  
睦不知如何陳奏并曾否准其所奏之處伏乞

大皇帝睿鑒

上諭曰頗羅鼎是僻處遠方之人爾準噶爾亦係僻  
處遠方之人朕為大皇帝不分內外一體眷顧為  
爾等不睦豈可偏聽遽罪頗羅鼎乎所以將不便

降旨之故令大臣曉諭爾等爾可謹記朕旨歸告  
噶爾丹策零知之

上親賜酒二爵禮成而退

二月乙巳

傳

諭駐藏大臣等預籌防範事宜

上諭軍機大臣等曰據此次夷使哈柳口奏有進藏  
熬茶之人由藏回巢頗羅鼎辦給牲畜路費不甚



妥協大槩是仍念拉藏汗舊仇是以如此等語又  
噶爾丹策零奏請賢能喇嘛一事朕已降旨西藏  
之人皆不願去此事頗羅鼐亦曾奏及喇嘛皆不  
願去朕難以強派準噶爾人等與頗羅鼐不睦之  
處業已顯露今雖無事不可不預為之備著傳諭  
駐藏副都統傅清令其密飭頗羅鼐務使留心有  
應如何防範預備之處詳慎辦理

甲寅

召見夷使哈柳賞賚有差

上召見哈柳於正大光明殿

諭之曰朕明日起程謁

陵俟回鑾令汝等朝見恐誤汝等行期故於今日召見  
汝等今天時漸暖汝等整裝完備即可起程歸國  
不必候朕回鑾也汝台吉奏請之事可行則准行  
無例不可行者則不准行朕惟準情酌理初無成  
見汝等謹記朕諭旨歸告噶爾丹策零在途謹慎

行走哈柳跪奏

大皇帝諭旨當謹記歸告噶爾丹策零荷

大皇帝恩典甚厚我等在路自必謹慎行走隨  
勅賜使臣及隨從之厄魯特等銀兩緞布如例  
賜準噶爾台吉噶爾丹策零勅書

奉

天承運

皇帝詔曰爾奏稱前往西藏誦經人等蒙恩賞給牲

畜口糧成全誦經之事不勝歡欣並請於土伯特  
賞給善於經呪喇嘛數人令經呪之教可垂久遠  
推廣不絕等語爾尊崇佛道因立法性教欲請西  
藏喇嘛實一善事朕觀奏內辭意敬順懇切甚屬  
可嘉但去年爾使臣進藏熬茶已向郡王頗羅鼎  
求請喇嘛彼地喇嘛因念爾等曾在藏內騷擾不  
願前往故頗羅鼎託言無大皇帝旨意並未發往  
亦曾經頗羅鼎具奏今爾使臣哈柳口奏頗羅鼎

仍念拉藏汗之仇於爾等進藏熬茶人牲畜路費  
並未支給妥協由此觀之爾等兩地相疑未忘舊  
事朕為大君不分內外視羣生如一體撫恤仁愛  
即佛道亦以安撫衆主為要衆喇嘛皆係佛門弟  
子伊等既不情願朕勒令前往可乎即使降旨令  
發給爾等喇嘛伊等亦未必肯發給賢能者此後  
爾等又不免藉為口實及生怨望頗羅鼎係僻處  
遠地之人準噶爾亦係僻處遠地之人爾等彼此

互有違言朕豈可偏聽遽罪頗羅蘇乎爾等地方亦有喇嘛豈無一善於經呪者且敬佛廣教只在於心亦不必專憑經呪何必求諸他人此事朕不必降旨令特勅付使臣哈柳齋回爾其善體朕意隨勅賜各色緞十端蟒緞粧緞各八端玻璃磁器各八事

傳

諭夷使哈柳令撤回移近內地游牧及定期貿易事

宜

先是署定邊副將軍參贊大臣拉布敦奏言上年十二月初六日據哈瑪爾沙扎海卡倫侍衛拜部遣員赴都圖淖爾布呼朱爾克等處瞭望偵探至布爾吉推河見有厄魯特宰桑額勒慎等十餘戶在此居住當即諭令移去據額勒慎云今天正寒冷又當我處牲畜孳長之時乞容暫住俟稍和暖即行移去等語又十二月十二

日據布延圖卡倫侍衛伯森特遣員出口偵探  
至布延圖河源四水總會地方見有烏梁海得  
木齊扎木禪等十餘戶居住亦諭令移去據扎  
木禪云因我們游牧處雪大暫住於此俟雪化  
後即行移去等語查厄魯特宰桑額勒慎所住  
之布爾吉推河與內地所放卡倫相去不遠行  
走一夜次早可到在都圖淖爾之西北又查烏  
梁海得木齊扎木禪亦係準噶爾之人並非本



地烏梁海所住之布延圖河源與內地所放卡  
倫察罕布呼地方相去有一宿之地又查布爾  
吉推河在哈瑪爾沙扎海卡倫以外其地在阿  
爾台山梁之外布延圖河源四水總會處與得  
里袞托爾本淖爾此三處其地俱在阿爾台山  
梁之內現在密劄兩處坐卡侍衛并鄰近坐卡  
侍衛等謹慎小心嚴行防範俟稍暖雪化厄魯  
特人等移去後即速詳報奏入得

旨軍機大臣會同額駙策凌議奏尋議伊等或因避  
雪來尋水草至此游牧似無他故但屢向內地  
卡倫近處居住日久未免生事現在夷使在京  
應面諭以守定界址毋許任意游牧令其回時  
告知噶爾丹策零即行撤回又議以使臣請  
安進貢非貿易之年不准攜貨此次哈柳仍違例攜  
帶貨物現奉

恩旨姑准赴肅貿易亦應俟使臣回巢之日申飭下

次不准復帶奏入

上從之是日

命尚書海望等遵

旨傳諭夷使哈柳令其歸告噶爾丹策零永遠遵守

哈柳敬謹受

命海望等覆奏報

聞

庚申

署理定邊副將軍參贊大臣拉布敦奏報巡查  
準噶爾烏梁海近塞游牧情形

拉布敦奏言據託爾和烏蘭坐卡侍衛曩喀賴  
等報稱正月二十三日遣員瞭望賊踪至黃加  
書魯克地方見準噶爾烏梁海得木齊烏爾巴  
齊因游牧處雪大帶領所屬十四家在此居住  
隨諭令移去據得木齊烏爾巴齊云我等在此  
居住實於理不合但因不得住處故暫居此俟

雪化後即行移回等語查託爾和烏蘭卡倫地方與科卜多城相近在科卜多河邊乃布延圖鄰卡其得木齊烏爾巴齊所住之黃加書魯克地方在阿爾台山梁以內與內地放卡之處相去八十里乃布延圖與託爾和烏蘭兩處卡倫尋跡之所現在託爾和烏蘭與上年所報布延圖哈瑪爾沙扎海一連三十以外皆有準噶爾人居住當即行文總管防守烏里雅蘇台等處

之參贊大臣烏爾登令其嚴飭坐卡侍衛等小心防範俟伊等移去後即行詳報奏入報

聞

甲子

準噶爾夷使哈柳自京起程還部

戊辰

更定查閱喀爾喀兵丁之例

上諭內閣曰喀爾喀四部落游牧處豫備之揚威兵

每年令軍營參贊大臣前往閱看但念此項兵丁  
頻年調遣查閱不免勞苦每年著各該處副將軍  
就近查閱軍營參贊大臣兩年閱看一次

三月己丑

查核軍營存貯米石

辦理軍機大臣等奏言上年額駙策凌奏銷乾  
隆八年用過米石一摺軍營所貯小米七萬七  
千餘石大麥麥子等糧折算小米共一萬五千

餘石內九年用過米石尚未奏銷現在所有兵  
丁一年應支米數約需九千八百餘石除上年  
用過米石外尚存米八萬二千餘石通計支給  
現在兵丁可足六七年之用前於乾隆三年五  
月內停止范毓馥運糧原議案內俟數年後應  
行運糧之時著額駙策凌再行請

旨今應遵照原議將軍營現貯米石核實具奏奏入  
報



開

戊戌

準噶爾部人彭蘇克等率屬來降

命賞給安插如例

夏四月己未

安西提督永常奏報準噶爾夷使哈柳等出境

癸亥

定邊副將軍額駙策凌奏報準噶爾近邊游牧

人等遷回情形

額駙策凌奏言三月初四日準噶爾宰桑額勒  
慎來至希巴爾沙扎海口內求見坐卡侍衛拜  
都告稱我台吉噶爾丹策零諭云蒙

大皇帝之恩准允求和汝等在額克阿喇勒西喇呼  
魯蘇等處游牧居住如遇

大國坐卡侍衛和好而行等語我遵台吉之諭到  
布爾吉推地方聞

大國卡倫在布延圖哈瑪爾沙扎海等處故我不  
敢前來今我台吉令我撤回特此告知并以酒  
醪為獻拜都即諭之云額克阿喇勒西喇呼魯  
蘇皆係我卡內之地現今荷蒙我

聖主隆恩許爾求和但爾地人等豈可在卡內地  
方居住以後宜恪守疆界不得妄行額勒慎即  
移回原地而去奏入報

聞

丁卯

停派軍營隨即察哈爾兵丁

辦理軍機大臣等奏言軍營隨將軍即務察哈爾兵一百名向例三年期滿經臣等議准改為五年更換一次今春額駙策凌到京臣等與之商議現今軍營無事所有兵丁有無應行裁減據額駙策凌言隨即察哈爾兵相應減去即於軍營喀爾喀兵內挑用今察哈爾兵一百名現

於本年七月內期滿應將此項兵丁令其撤回  
本處不必另派更替其需用隨印兵丁即於喀  
爾喀兵丁內揀選應用奏入

上從之

五月庚辰

恩免誤給投誠厄魯特等應追口糧

上諭內閣曰近據正黃旗蒙古旗分奏請將誤照新  
滿洲例辦給併入本旗回子瑚連雅爾等口糧米

石之大臣官員交部察議等語瑚連雅爾等俱係  
從前投順照例賞給產業安插已定之人業經數  
年又引新滿洲例請給口糧該管官並不詳察即  
行支給甚屬錯誤著交部察議至因瑚連雅爾一  
案以致併入八旗內有已經補給亦有尚未補給  
者此皆誤認瑚連雅爾一案視為定例遵照而行  
非首先錯誤者可比俱著免其查議再此項厄魯  
特回子等係遠方新來投誠之人不知定例冒昧

請給情屬可原著將伊等治罪及追賠多領口糧之處槩行寬免嗣後無庸支給並將此旨明白曉諭知之

乙亥

準噶爾部人圖魯孟克挈眷來降

命賞給安插如例

秋九月庚午朔

議定投誠厄魯特等挑補食糧事宜

辦理軍機大臣等奏言查準噶爾投誠之厄魯特回子等安插各處賞給置產等項銀兩甚為充裕其又作為額外護軍披甲支給錢糧者特因伊等感

天朝仁化邊遠來投故加格外

殊恩至伊等所出額外護軍等缺若再行挑取伊等子孫頂補不免過優請嗣後安插各處之厄魯特回子等所有應賞置產銀兩照例辦給外伊



等俱係歸八旗分佐領之人若本身已故出有  
空缺即照理藩院所辦選伊子息內漢仗可觀  
堪供差遣者該管大臣酌量挑取本佐領下額  
缺不准挑補額外護軍披甲即有子息幼小不  
能料理產業者其未長成以前該管大臣派人  
照管產業令其足資養贍再此後投誠之人奉  
旨賞給額外護軍披甲者毋庸支給全分錢糧均給  
半分錢糧仍令該管大臣不時稽查毋到妄費

俾得從容養贍奏入

上從之

準噶爾部人烏巴什率屬九人來降

命賞給安插如例

冬十月己未

準噶爾部人策零及德卜珠爾率屬來降

命賞給安插如例

甲子

三十五  
卷四十八  
準噶爾部人博爾第等來降

命賞給安插如例

十一月己卯

更定駐藏辦事大臣章京筆帖式換班成例

駐藏別都統傅清奏言從前駐藏章京筆帖式  
換班之期照哈密等處三年一換但俱係錯綜  
更換以便交代嫻習後因將驛站官兵撤回錯  
綜更換路遠難以獨行派出駐劄里塘巴塘等

處兵丁護送往來臣因此次來藏由成都派官  
兵護送沿路留心察看見唐古忒兵中途間有  
偷搶之事請嗣後在藏辦事大臣奉

旨派出時該處即行文四川總督令派換班官兵等  
候該部將換班章京等帶領引

見派出後與大臣同至成都帶領換班官兵一同更  
換則不需護送之兵可無偷搶之事再藏內不  
比內地凡事隨到隨辦即有辦過相類事件到

時亦可查按舊檔辦理似無庸錯綜更換奏入  
得

旨軍機大臣議奏尋議哈密瓜州西寧辦事大臣章  
京筆帖式俱係三年一換其駐西藏辦事大臣  
章京等令錯綜更換者原為新舊相參易於辦  
事起見今據傳清奏稱藏內事原可隨到隨辦  
毋庸交代嫻習而錯綜更換時必須撥兵護送  
轉多勞費應照傳清所奏嗣後駐藏大臣章京

筆帖式等皆酌量於綠營換班之期三年一換  
俟更替之大臣等至藏清查事檔交代明白後  
舊駐大臣等帶領官兵同回內地不必仍循錯  
綜更換之例則可省撥兵護送之繁仍無貽誤  
地方事務奏入

上從之

壬午

命西北兩路將軍大臣等籌備防範事宜

上諭軍機大臣等曰據安西提督李繩武奏稱昨據由準噶爾脫回之吐魯番回民海底里稟稱噶爾丹策零於今年九月內業已病故彼於各處卡倫俱添兵防守等語應寄信密諭西北兩路將軍大臣等噶爾丹策零病故之信伊雖未遣使具奏而固我邊境防範豫備之處斷不可忽至於乘伊有喪之際發兵征討此事朕斷不為但恐伊部落內彼此心離以生變亂或潛至邊境偷奪牲畜或有

意投入我境窺伺情形均未可定惟當示以大義  
固守邊疆嚴謹卡倫一切應行豫備之處令將軍  
大臣等悉心籌畫妥協辦理豫為防範

十二月壬子

駐藏副都統傅清奏報偵探準夷情形

傅清奏言臣欽奉

上諭飭令郡王頗羅鼐於今年卡倫處派素所深信  
之人遠出偵察準噶爾踪跡今於十月初三日



據頗羅鼐呈稱今年三月二十日派深信之薩  
嘉達克齊博爾博等三十名探望準噶爾做善  
事回巢踪跡據伊等回告越過阿哈雅克卡倫  
到噶斯路上探得準噶爾人等回巢路上人畜  
多有死傷情形甚屬艱窘又據頗羅鼐呈稱拉  
達克汗策卜登那木扎爾寄信內稱從前葉爾  
羌人等每年到我所屬地方貿易自準噶爾熬  
茶以來一年有餘不見有人來此貿易因遣二

人前往薩納珠口採取信息據伊等回告探得  
準噶爾部內墨得格齊巴圖魯宰桑等出痘死  
者十三人其屬下出痘死者甚衆噶爾丹策零  
畏懼向從前奪取哈薩克游牧之北地方藏避  
又準噶爾所屬吉爾吉爾頭目二人不和內頭  
目甘班圖伯克殺死一頭目併據其地修造薩  
瓦爾格里雅城截奪往來買賣人等後噶爾丹  
策零避痘回巢派兵三千名進征吉爾吉爾薩

瓦爾格里雅城將吉爾吉爾之甘班圖伯克殺  
死屬下人等俱帶至厄魯特地方居住又噶爾  
丹策零遣宰桑數人向查汗薩瓦爾部落講和  
其現在信用大宰桑二名一係巴圖魯之子拉  
沁一係策零敦多卜之子扎克巴又有阿木賓  
禪汗強暴有力占據四處部落所屬有阿卜都  
爾噶里木部落中途又有博洛爾汗部落博洛  
爾汗部落內無汗係哈屯楚哈爾辦事噶爾丹

策零在阿卜都爾噶里木看視行兵之路遣回  
子巴克達呼雅遜都喇呼沙巴勒賓等四十人  
前往彼處人猜疑殺死三十三人惟七人遁歸  
噶爾丹策零愈怒派厄魯特兵二萬四千哈薩  
克兵四千吉爾吉爾兵二千令伊族台吉策卜  
登圖拉爾滿積圖拉爾袞都爾圖拉爾於今年  
正月內起程前往但聞阿卜都爾噶里木汗力  
量充足兵丁强健勝負未知如何等語奏入報

聞

甲寅

扎薩克頭等台吉齊旺多爾濟卒以其姪旺對承襲

上諭內閣曰駐藏副都統傅清奏扎薩克頭等台吉齊旺多爾濟病故據郡王頗羅鼐請將齊旺多爾濟職銜賞給伊姪旺對伊係合家受恩之人令其管轄兵丁辦理諸務實為有益朕前加恩將烏鎮

和碩齊作為扎薩克頭等台吉給伊弟承襲以來  
所交諸務奮勉出力今齊旺多爾濟病故請將伊

兄訥顏和碩齊之子旺對承襲著照所請施恩令

旺對承襲扎薩克頭等台吉

安西提督李繩武奏報準噶爾進

貢使臣哈柳等入境

平定準噶爾方略前編卷四十八